

MISSINGIUT

Ulloq: 10. november 2021
Allaffik: Nordatlantkontoret
Suliarinn.: Amanda Stilling
Sagsnr.: 2018-008-0057
Dok.: 1595779

Folketingip Ombudsmandia pillugu inatsisip allangortinneqarnissaa pillugu inatsisip assigiinngitsut Kalaallit Nunaannut atuutilersinneqarnissaannut peqqussut

UAGUT MARGRETHE AAPPAAT, Guutip saammaassineratigut Danmarkip Dronningia, uppersarparput:

Folketingip Ombudsmandia pillugu inatsimmi, inatsit nr. 473, 12. juni 1995-imeersumi § 34, imm. 2ⁱ, Folketingip Ombudsmandia pillugu inatsisip allangortinneqarnissaa pillugu inatsit nr. 556, 24. juni 2005-imeersukkut allangortinneqartumi (Kommunikationsservice, inatsisip Savalimmiuni Kalaallit Nunaannilu atornerneqarnissaata il. il. malitsigisaannik allanguinerit), Folketingip Ombudsmandia pillugu inatsisip allangortinneqarnissaa pillugu inatsit nr. 502, 12. juni 2009-meersumi § 3, imm. 1ⁱⁱ, (Folketingip Ombudsmandiata soraarnerussutisiai, oqartussaaffinnut ilaannakortumik pisortanit ingerlanneqartunut kiisalu suliffeqarfinnut namminersortunut il. il. atatillugu piginnaatitaaneri) aamma Folketingip Ombudsmandia pillugu inatsisip allangortinneqarnissaa inatsit nr. 568, 18. juni 2012-imeersumi § 3, imm. 1ⁱⁱⁱ (Folketingip Ombudsmandiata piffissaq suliffigisassaata aalajangersarnera, Folketingip Ombudsmandianut isumaqatigiissuteqareernikkut soraarnerq, soraarnerussutisiaqarneq aamma kingornatigut akissarsiat pillugit maleruagassat avaqqunneqarsinnaanerat, kiisalu Folketingip Ombudsmandiani meeqqanut allaffimmik pilersitsineq), naapertorlugit aalajangersarneqarpoq:

§ 1

Folketingip Ombudsmandia pillugu inatsit nr. 473, 12. juni 1996-imeersumi, inatsit nr. 556, 24. juni 2005-imeersukkut allangortinneqartumi tulliuttunik allanguisoqassaq:

1. § 1-imi imm. 1-ip kingorna immikkoortut nutaat ilanngunneqassapput:

»Imm. 2. Ombudsmandip piffissaq atorfeqarfia ukiunit 10-nit sivilisunerusinnaangilaq.

Imm. 3. Folketingimut nutaamik qinersisoqareernerata kingorna, imaluunniit Ombudsmandip piffissaq atorfeqarfiata naareernerata kingorna, ombudsmandi atorfimmini ingerlaqqiinnassaaq, Folketingip ombudsmandimik nutaamik toqqaanissaata tungaanut, ombudsmandillu nutaamik qinigaasup atorfimminut ivertitaanissaata tungaanut. Taamaattoq Folketingi Folkeringimut nutaamik qinersereertoqarnerata kingorna imaluunniit ombudsmandip piffissaq atorfeqarfiata naareernerata kingorna kingusinnerpaamik qaammatit 6-t qaangiunneranni ombudsmandimik qinersissapput.«

Imm. 2 allannguinerup kingorna tassaalerpoq imm. 4.

2. § 5-imi »utaqqinermi aningaasarsiat« allanngortinneqassaaq: »kingorna aningaasarsiat«-nngorlugu aamma »§§ 3-7« allanngortinneqassaaq: »§§ 3-5«-nngorlugu.

3. § 5-imi *imm. 2*-tut ilanngunneqassaaq:

»*Imm. 2.* Ombudsmandip ministerit akissarsiaat soraarnerussutisiaallu il. il. pillugit inatsimmi § 5 malillugu naatsorsugaasut kingorna akissarsiarititaasut soraarnerussutisiaallu pinnagit, maleruagassat Folketingip atorfilittaanut atuuttut malillugit naatsorsugaasunik soraarnerussutisiaqarnissaaq qinnuteqaatigisinnaavaa, tak, atorfillit soraarnerussutisiaat pillugit inatsimmi § 1, imm. 2, taamaalilluni piffissaq ombudsmandip ombudsmanditut atorfeqarfigisimasaa soraarnerussutisiaqarnissamut ukiunut tamarmiusunut ilanngullugu naatsorsorneqarsinnaassalluni.«

4. § 6, *imm. 2*-mi »utaqqiisaasunik aningaasarsiat« allanngortinneqassaaq imaalillugu: »kingorna aningaasarsiat«-nngorlugu.

5. § 6-imi *imm. 4*-tut ilanngunneqassaaq:

»*Imm. 4.* § 4, imm. 1, § 5, imm. 1, pkt. 2., aamma imm. 2, aamma § 6, imm. 1-3, ombudsmandip aamma Folketingip siulittaasuata isumaqatigiissuteqarnerisigut avaqqunneqarsinnaapput.«

6. § 7, *imm. 1*-imi »pisortat ingerlatsiviata« kingorna ilanngunneqassaaq: », naalagaaffiup oqartussaasuinit isumagineqartut«.

7. § 7, *imm. 1*-imi *pkt. 2.*-tut aamma *3.*-tut ilanngunneqassaaq:

»Ombudsmandip suliaqarfianut aamma ilaavoq kiffaanngissusiigaasut suliffeqarfinni namminersortuni il. il. atugaat, tamatumani kiffaanngissusiigaaneq naalagaaffimmi oqartussat aalajangiinerisigut,

kaammattuuteqarnerisigut imaluunniit naalagaaffimmi oqartussat akuerseqataanerisigut imaluunniit akuersinerisigut kiffaanngissusiiiaaneq pisimappat. Aammattaaq ombudsmandip sulineranut ilaapput meeqqat suliffeqarfinni paaqqinnittarfinni il. il. namminersortuni atugarisaat, suliffeqarfiit paaqqinnittarfiit taakkua suliassaqarfinnut naalagaaffiup ataaniittunut atatillugu suliassanik isumaginnittuuppata.«

8. § 7, imm. 4, imatut oqaasertalerneqassaaq:

»Imm. 4. Piginneqatigiiffiit, suliffeqarfiit, peqatigiiffiit il. il. inatsit Folketingimit akuerineqartoq malillugu imaluunniit allaffissornikkut naalagaaffiup oqartussaasuinit aalajangigaasoq malillugu maleruagassanut tunngavinnullu pisortat ingerlatsinerannut atuuttunut tamakkiisumik ilaannakortumilluunniit akuutinneqalerpata, Ombudsmandip aalajangersinnaavaa suliaqarfiit taakkua pineqartut tamatuma annertoqataanik Ombudsmandip sulineranut ilaatinneqassasut.«

9. §§ 8 aamma 9 atorunnaarsinneqassapput.

10. § 11, imm. 2-mi », ministeri, kommunalbestyrelsi imaluunniit nunap immikkoortuani siunnersuisoqatigiit« allanngortinneqassaaq imaalillugu: »imaluunniit ministeri«-nngorlugu.

11. § 12, imm. 1, pkt. 2., atorunnaarsinneqassaaq.

12. § 12-imi imm. 2-tut ilanngunneqassaaq:

»Imm. 2. Ombudsmandip sulinerminut atatillugu nakkutigissavaa naalagaaffimmi oqartussat susassaqarfiini inatsisit atuuttut imaluunniit allaffissornikkut aalajangersakkat Danmarkip meeqqat pisinnaatitaaffiisa qulakkeernissaannut nunanut tamalaanut pingaartumillu Naalagaaffiit Peqatigiit meeqqat pisinnaatitaaffii pillugit isumaqatigiissutaannut atatillugu naleqquttuunersut. Ombudsmandip amigaateqartoqartoq nalileruniuk ombudsmandip Folketingi ministerilu susassaqartoq tamatuminnga ilisimatissavai.«

13. § 13, imm. 1, pkt. 1.-mi »§§ 7-9« allanngortinneqassaaq: »§ 7«-inngorlugu.

14. § 13-imi imm. 4-tut ilanngunneqassaaq:

»Imm. 4. Ombudsmandip pisuni immikkut ittuni imm. 3-mi piffissaliussaq sivitorsinnaavaa.«

15. § 18-imi oqaaseqatigiit pkt. 2.- tut ilanngunneqassapput:

»Misissuinnermut taamatut ittumut atatillugu Ombudsmandip § 21-p malitsigisaanik iliuusissami saniatigut pissutsit suliffeqarfiup imaluunniit oqartussat aaqqissugaanerat ingerlatsinerallu misissorsinnaavai, kiisalu suliffeqarfiup imaluunniit oqartussat atuisuinik katsorsaanerup sammi-saqartitsinerannillu pissutsit nalinginnaasumik inuttut pissutsinik inuppalaassutsimillu pissutsinik aallaaveqarluni misissuisinnaalluni.«

16. § 19, imm. 1-imi »Oqartussat« kingorna ilanngunneqassaaq: »il. il.«, aamma *imm. 2-mi »oqartussat«* kingorna ilanngunneqassaaq: »il. il.«

17. § 19, imm. 3, pkt. 2.-mi, »eqqartuussisarnermik inatsimmi kapitali 68« allanngortinneqassaaq: »Kalaallit Nunaanni eqqartuussisarnermik inatsimmi kapitali 34«-nngorlugu.

18. § 19 -imi imm. 5-itut ilanngunneqassaaq:

»*Imm. 5.* Ombudsmandi tamanna pisariaqartutut nalilerneqarpat, qaqugukkulluunniit pisariaqartitamik kinaassutsimik uppersaateqarluni aamma eqqartuussivikkut aalajangigaanngitsumik suliffeqarfiit namminersortut il. il. misissuiffiginissaannut isersinnaatitaavoq, taakkua inunnik kiffaangissusiagaasunik tigungmiagaqarpata imaluunniit tigungmiagaqarsinnaatitaappata, tak. § 7, imm, 1, pkt. 2., aamma suliffeqarfiit paaqqinnittarfiit namminersortut il. il. meeqqanut atatillugu suliassanik isumaginnillutik taamatut tigungmiagaqartut, tak. § 7, imm. 1, pkt. 3. Politiit tamatuminnga piviusunngortitsinissamut pisariaqarpat ikiuussinnaapput.«

19. § 20, imm. 2, imatut oqaasertalerneqassaaq:

»*Imm. 2.* Ombudsmandip aalajangersinnaavaa oqaaseqaat, nassuiaat imaluunniit nalunaarusiaq aamma taakkunannga utaqqiisaasumik naqi-taagallartut kiisalu tusarniaanermi allakkiat kiisalu tusarniaanermut akissutit aatsaat allagaatinik takunnissinnaanerup kingorna saqqummiunneqassasut, inaarutaasumik oqaaseqaatip, nassuiaatip imaluunniit nalunaarusiap oqartussanut susassaqtunut nassiunneqarnerisa aqaguani.«

20. § 21-mi pkt. 2.-tut ilanngunneqassaaq:

»Tamatuma saniatigut Ombudsmandip misissuiartorluni sulineranut § 18-imi aalajangersagaq atuuppoq«

21. § 24, pkt. 1.-imi »Folketingip inatsiseqarnermut ataatsimiititaliaa«-ta kingorna: »amma ministerimut susassaartumut« ilanngunneqassaaq.

22. § 24, pkt. 2., atorunnaarsinneqassaaq.

23. § 25-mi »innuttaasut« allanngortinneqarpoq: »inuinnaat«-nngorlugu.

24. § 30-imi »Folketingip« kingorna ilanngunneqassaaq: »imaluunniit Inatsisartut«.

§ 2

Imm. 1. Peqqussut ulloq [...] atuutilissaaq.

Tunniunneqarpoq [____], ulloq [____]

Kunngiussutsitsinnik Atsiorpugut Naqissusiillutalu

MARGRETHE R.

/ Nick Hækkerup

i Aalajangersagaq imatut oqaasertaqarpoq: »Kunngip peqqussutaatigut Kalaallit Nunaannut inatsit allanngortinneqarsinnaavoq, Kalaallit Nunaanni pissutsit immikkut ittut pisariaqartitaannik allannguutitalerlugu.«

ii Aalajangersagaq imatut oqaasertaqarpoq: »Inatsit Savalimmiunut aamma Kalaallit Nunaannut atuutinngilaq, kunngilli peqqussutaatigut Savalimmiunut aamma Kalaallit Nunaannut atuutsinneqalersinnaalluni, Savalimmiuni aamma Kalaallit Nunaanni pissutsit immikkut ittut pisariaqartitaannik nikinganeqartillugu.«

iii Aalajangersagaq imatut oqaasertaqarpoq: »Inatsit Savalimmiunut aamma Kalaallit Nunaannut atuutinngilaq, kunngilli peqqussutaatigut Savalimmiunut aamma Kalaallit Nunaannut atuutsinneqalersinnaalluni, Savalimmiuni aamma Kalaallit Nunaanni pissutsit immikkut ittut pisariaqartitaannik allannguutitalerlugu.«